

Uunga siunnersuut: Pisortanut akiitsut akilersinniarneqartarnerat pinaveersaartinneqarnissaallu pillugit Inatsisartut inatsisaata allanngortinneqarneranik Inatsisartut inatsisaat

pillugu

Aningaasaqarnermut Akileraartarnermullu Ataatsimiititaliap

ISUMALIUTISSIISSUTAA

Siunnersuutip aappassaaneerneqarnerani saqqummiunneqartoq

Suliarinninnermini ataatsimiititaliaq ukuninnga inuttaqarpoq:

Inatsisartunut ilaasortaq Jens Imanuelsen, Siumut, siulittaasoq
Inatsisartunut ilaasortaq Steen Lyngø, Atassut, siulittaasup tullia
Inatsisartunut ilaasortaq Jess Svane, Siumut
Inatsisartunut ilaasortaq Tillie Martinussen, Demokraatit
Inatsisartunut ilaasortaq Naaja Nathanielsen, Inuit Ataqtigiiit
Inatsisartunut ilaasortaq Sara Olsvig, Inuit Ataqtigiiit
Inatsisartunut ilaasortaq Peter Olsen, Inuit Ataqtigiiit

Ulloq 19. marts 2015-imi siullermeerinerup kingorna ataatsimiititaliap siunnersuut misissorpaa.

1. Siunnersuutip imarisaa siunertaalu

Inatsisissatut siunnersuutip imaraa aningaasat ilanngartuutigineqartut (akissarsianit ilanngatigineqartut) akilernissaannut killiliussap allanngortinneqarnera. Piffissaliussaq qaammatip akiligassanngorfiup ulluisa 20-annit qaammatip akiligassanngorfiup kingorna qaammatip tullittup ulluisa aallaqqaataannut allanngortinneqarpoq.

Siunnersuut akileraarutit A-t aamma iluanaarutisianit akileraarutit akilerneqarnissaannut piffissaliussat allanngortinneqarnerannut (UKA 2013/100), akileraarutit A-t aamma iluanaarutisianit akileraarutit akilerneqarnissaannut piffissaliussamik qaammatip akiligassanngorfiup kingorna qaammatip tullittup ulluisa aallaqqaataannut kinguartitsinermik kinguneqartumut attuumassuteqartoq siunnersuuteqartup paasissutissiissutigaa.

2. Siunnersuutip Inatsisartunit siullermeerneqarnera

Siunnersuut naalackersuisooqatigiit partiivinit nalinginnaasumik tapersorsorneqarpoq. Tusarniaanerup ingerlanneqartarnera pillugu Naalackersuisut Kanukokallu akornanni isumaqatigiissutigineqarsimasut naapertorlugit tusarniaanerup ingerlanneqarsimannginnera Inuit Ataqtigiinnit assut ajuusaarnartutut isigineqarpoq.

3. Tusarniaanermit akissutit

Siunnersuutip matuma ataatsimiititaliamit suliarineqarneranut atugassatut tusarniaanermut akissutigineqartut assilineri ataatsimiititaliamit pissarsiarineqarput. Ilusiliinissamut piumasaqaatit Inatsisartut Siulittaasoqarfiannit aalajangersakkat naapertorlugit tusarniaanermut akissutit inatsisissatut siunnersuutitut Inatsisartunit suliarineqartussatut tunniunneqartunut ilanngunneqartarnissaat ataatsimiititaliamit kaammattuutigineqassaaq.

Tusarniaanermut killigitinneqartoq piffissarlu tusarniaaffiusoq ataatsimiititaliamit sakkortuumik uparuarneqassapput, tassami piffissap sulinngiffiusup, tamatumalu kingunerisaanik tusarniaaffigineqartut ullut suliffigisassaasa nalinginnaasumik ikinnerunerat Naalackersuisunit annertunerusumik isiginiarneqassasoq naatsorsuutigineqartariaqarmat.

Naalackersuisut siulittaasuata KANUKOKA-llu isumaqatigiissutigisimasaat KANUKOKA-p tusarniaanermut akissummini innersuussutigaa, tamatumani illuatungeriinnit isumaqatigiissutigineqarsimalluni tusarniaanerit juulip qaammataani ingerlanneqartariaqanngitsut, tassa juulip qaammataa nalinginnaasumik sulinngiffeqarfiusarmat. Taamatuttaaq illuatungeriinnit isumaqatigiissutigineqarsimavoq *pissutsit immikkorluinnaq ittut aatsaat atuutsillugit* tusarniaaneq sapaatik akunnerinit tallimanit sivikinnerusinnaasoq.

Inatsisissamik piareersaalluni sulinermi tusarniaaffigineqartut ikittuinnaat ilanngussaqaarsimanerat ataatsimiititaliamit paasineqarpoq, tamatumunngalu pissutaasimasinnaalluni KANUKOKA-mut isumaqatigiissutip siuliani taaneqartup Naalackersuisunit malinneqarsimannginnera. Naalackersuisut tusarniaassutaannut KANUKOKA-p akissuteqarneranit Inatsisartut upernaakkut ataatsimiinnissaata aallartinnissaata tungaanut qaammatit arfineq pingasut ingerlasimapput. Taamaattumillu ataatsimiititaliap isumaa malillugu tusarniaanermut akissummik KANUKOKA-p nassiussinissaata periarfissinneqarnissaanut periarfissaqarluarsimalluni.

Tusarniaanermut akissuteqartut sinneri siunnersuummut allanik oqaaseqaatissaqanngitsut ataatsimiititaliamit paasineqarpoq.

4. Ataatsimiititaliap siunnersuummik suliarinninnera

Ataatsimiititaliap siunnersuuterpiamut allanik oqaaseqaatissaqanngilaq. Tamanna tunngavigalugu inatsisissatut siunnersuutit tusarniaanermut piffissaliussatut illuatungeriinnit isumaqati-

giissutigineqarsimasut naapertorlugit piffissaqartitsilluni tusarniaassutigineqarsimatinnagit saqqummiunneqartannginnissaat ataatsimiititaliamit Naalakkersuisunut kaammattuutigineqarpoq, tak. tamanna pillugu isumaliutissiisummi immikkoortoq.

5. Siunnersuutip aningaasaqarnikkut kingunerisassai

Siunnersuutip aningaasaqarnikkut kingunerisassai siunnersuummut nassuiaatini allaaserineqarput. Tunngavissat pigineqartut tunngavigalugit nassuiaatini saqqummiunneqartunit allatut naliliinissaminut ataatsimiititaliaq pissutissaqarsorinngilaq.

6. Ataatsimiititaliap inassuteqaataa

Tamanna tunngavigalugu siunnersuutip Inatsisartunit akuerineqarnissaa **Akilerartarnermut Akitsuusiisarnermullu Ataatsimiititaliap isumaqatigiittup inassutigaa.**

Taama oqaaseqarluni isumaliutissiisummilu allassimasutut paasinnilluni ataatsimiititaliap siunnersuut aappasaaniigassanngortippaa.

Jens Immanuelson,
siulittaasoq

Steen Lyngø

Jess Svane

Tillie Martinussen

Naaja Nathanielsen

Sara Olsvig

Peter Olsen